


# Alhou no Ashiahji Kivi Kupughu Shitsu



*Akumzapu Kuchougo  
Kiphi Kichekutsu*

13



**Ashiahji** tuchotsukeu kumla kije ye amekuhae ipi acheni- ikemu tile shikipivimi sumono shikipivi kumla kije shilunanikeshea? Shikipivimi sumono shikipivi kumla kije shilunani ipi noye phuphe tsulunanima? ... O phimpi akivishi tuchomujo achelo. Phuikomi no cholestero - tobacco-axipi, stress- mughachhi, obesity-athapubeikeu, alcohol-akuputsuji, hipaqono ashiahji shipusave chekeu ghili kutughutsu ani. Alhou ye opelo kuchouno oshiahji akivishi tuchochepenishi ani. opelo Baibel lo ashiahji akivishi qhipuanikeu kupughu lo ighipenishi ani. Akumzapu kuchougo kiphi lono kishi oshiahji tucho kelono axushu nanikeno pitsu ani. Akiphi kiche puatsu keu lo phijulo. Pai phiqhinike ghenguno akiphi hule hile ilhe ikukevilo, ikemu asheshino tsaqui ashekichishi phijulo.

1

## Ashiahji akivishi qhipuanikeu yehza ye kuchouno Baibel kukhuayeh keshea?

**“Kimiye chekemiyo, nongu pelo thime kumtsu lo thuulu eno ashiahji ghi akivishi qhipua chepenishi ani”**  
(3 Johan 1:2).

**Khokichile:** Iye. Baibel lo ashiahji akivishi qhipuachenikeu ghili yehkeuno Yekikithi- atighiu lo ani. Luthu lakhi kukumusu eno aghungu lo lhoayehqo kumtsu aphimpi sasú kuthukimepe ani, eno pukhubekilepe ani. Alhokusa no hipano kuthu lo lakhi xeve aye kutau kumtsu lo kitixewove cheni. Tsutsala aphimpi petha pimive aye akukumusu lo eno aghungu lo lhoayehqo lo Alhou no shipenishi akeu toi shimplave cheni. (Johan 10:10 lo julo).

2

## Alhou ye kushiye ashiahji akivishi qhipuachepenikeu yehza pesu Pa w timiqo tsukea?

**“Alhou no ayehza hipaqo papelo ipi ahza ningu tsupuni, Ampeu ningu Lhou sumsalo, tino alhokuthu lo ningu kivipu ghengunoke, tishi aye Pano ningu pelo xu achepe nanike”** (Zahkiniu 6:24).  
**“Nongu ye Ampeu huthulo, tishiaye Pano asho eno azu pesu nongu kumughatsunani, eno lno nongu launo akusulhousaqo ikhisuuvetsu nanike”** (Ipekulu 23:25).

**Khokichile:** Alhou no timi pelo ashiahji akivishi qhipuapenikeu yehza tsu, kughengu timi phimpi kivipu ghili Pano ithi anike. Car kumlamiqo no panono car akithe mlaphepuakeu kishi peithamaye sakeno kichekutsu qhipuatsu cheni. Tipau papeno peithakeu lono akivishi ado kushuwa peithalucheni. Titoi ningu phimpi Kumla u Alhou no ningu phimpi eno ningu shiahji kishi akivishi qhipuani, tuchomujonikeno kichekutsu kaku “mlapuatsu” ani, tiye Baibel ke. Alhou no papeno mlaita penikeu kicheku tsu (manual) mlapuatsu ani. Tipau kughuchove aye momu kukuthave aye akusu kughalunenani, akusu tipauno akukumusu shipusavetsunani, eno akukumusu shipuavetsukeu huno akuxu pitilevenani. Car ghili kiche piyesukeu papemovekeu lono shipusave cheni. Alhou no tsupuakeu yehza pape aye “oshiahji xalunani” (Leshele 67:2 KJV). Eno alau kupukuno kuxu xulunani (Johan 10:10). Ninguno Pa gholo mlakuqha puzu Alhou no ashiahji kivi yehza tsukeu hipau papeno xuaye Satan no akusu pithe suighikeuye ningu xevemonani” (Leshele 103:2, 3).



3

## Alhou no ashiahji kivi yehza tsupuakeu lo chuqu kusho lo kiuana shikupusapu anikeshea?

**“Kiuno akivi keno ti chulo” (Isaya 55:2). “Nono chu sho eno mlakemutsu lo Alhou jukuvupu shitsulo” (1 Korinthiami 10:31).**

**Khokichile:** Iye. Khristomi lakhi ye pano kutashi chu sho lo, tishikeu lono Alhou jukuvupu shitsulo. Kiuno akivikeno ti kishelulo. Tsutsala Alhou no ovilo thime lakhi chukevilo ipi aye, tiye Pano oghenguno akivi ithi anike. Paye ayezha mkamughai oshou bemonani, kughengu Paye kimiye kiniu Lhou ke. Baibel lono hito pi ani; Ikemu “akumuzu laghi lo chechekemi lauye thime kiumu suchileve chemoe” (**Leshele 84:11**). Tighenguno Alhou no akumla khikhi ningu vilo shikevilo ipi anike no tiye ningu kivipu ghengunoke.

**Hi ithilo:** Pa momu li no aghoaghoshi chunishi shonishikeu chuqukusho chu sho ghi ye kungugha yehkipe lo ilolumonani. Jisu Khristo no Akuxupu Mpeu, eno Xakuluuke, Pa tsa gholu eno papekemino ilo Pa gholo ngolunani. Alhou no ashiahji akivishi qhipuanikeu yehza tsukeu papemokemiye akivi Xakuthami kishemlave nani, eno xakulu vezuvenani.

4

## Alhou no tokhoikeu lo panongu lhosukelo panongu pelo kiu chu penike tsukea?

**“Alhou no pi, julo, atsuni athi pithi chekeu ... eno asubo athi pithikeu pesu otsu nani ... Aghutu lo asubo kumtsu nono lilali chulunani” (Bothubo 1:29; 2:16).**

**Khokichile:** Hukuthu lo Alhou no achuqupu pesu timi tsukeu ye axathi, aghilothi, eno aghino kuzupe akeu xathi tiye ghakuthi toikeu, eno athiu no yetuni tsughiqo ghi sukuqhatsu” (**Bothubo 3:18**).



## 5

## Alhou ye mithemokeu lhouxo eno lakhapuakeu chuqupuqo kiu kichetsukea?

**Khokichile:** Achine kaku akihedo 11 eno Zahkiniu akihedo 14 lono Alhou no mithemokeu chuqu kichepiyesupuan. Akihedo hikuma kinikujo qhoi phijulo.

- Tsakidemokeu eno apukhumutsu shobamokeu lhouxuqo ye mithemo (**Zahkiniu 14:6**).
- Akha eno azu lo lhouxo achishibo eno ayiko pumokeu ye mithemo (**Zahkiniu 14:9**).
- Aghau lhouxo kutau mighiqhi cheku, akithi sukumo mighichu cheku eno akha pechu cheku ye mithemo (**Achine 11:13-19**).
- Itikiche lhouxuqo ye mithemo (**Achine 11:21-44**).

**Hi ithilo:** Timiqo no ayeghi lo kiche lhouxo, aghau, eno azu lo lhouxuqo balhashi akimithekepieno chu acheni. Ikemu tile hami chumlakepu ani. Alhou no kichetsukeu kiqu lo ayeghi lo kiche lhouxo chumokepu ani. Akhosa, atsu, khura, qadaha, awo, ajiqili, bilatiji, atsuko-matsako ipicheku, achuwa, ajokha, achui-frog, eno kutau kutauqo ani.



## 6

## Awoshi chuchekemiye Jisu ighikelo kutsave nanikeshea?

**“Julo, Ampeu ye ami pesu cheni ... Eno Ampeu no Pa zutakikihi pesu ashi kumtsu shou kughathabe nani; tile Ampeu no kutomo ghiqhivenani. Khiunoqo pano kutoshi pano shikimithe eno shikutsughi anikepi (aphikimithe shi anikepi) awoshi chu eno aphukumqhupu kuchhubekupu shi chu, eno aji shi chuchenikeno kumtsu puhakuqhawe nani” (Isaya 66:15-17).**

**Khokichile:** Hiye kichithughuikupu lakhi, ikemu hiye kuchouke eno timiqo no tishi kuputsa eno kugha acheni. Baibel no pi akeuno khiuno awoshi chunikeno eno aphukumqhupu mithemokeu shi chunikeno Ampeu no ide ighikelono kutsavenani. Ampeu no ningu vilo kiu qhivelopi eno chukevilo pikeno ningu ye tipaqo pukaputsano qhive eno chumovema yesa. Ampeu tsa gholumayesa. Adam ngo Eve pama ghi lakha puakeu xathi chuveku lono axine shive eno akithi ayeghi lo ighive. Alhou no lakhapu akeu khunoala e hiye kumo kumoe ipilunani keshya? Alhou no pi akeuno, “Thime khikhi lno pulomokeno tipau kishelukemi ye kutsavenani (**Isaya 66:4**).

7

## Ikemu hi mithe eno mithemokeu ye Muse yehza, eno tiye Judahmiqo ghenguno, eno tipaqo ye cross lono shiphuhaveake kumokeshea?

“Ampeu no Noah vilo ... o gholo akimithe lhoxu tuna tsuni salulo ... eno mithemokeu lhoxu ye tuna lakhi likhi salulo” ipi (Bothubo 7:1, 2).

**Khokichile:** Khilemo kumoe. Noah ye Judah shiyeh ipeghimphi zuu ado kushuwa lono xu ighivekemi, tishimu paye mithemokeu eno mithekeu lhoxu ithi kututa shilu. Kughengu pano ashuka lo ilonikelo mithekeu lhoxuqono tsunini tiye tuna tsunini eno mithemokeu lhoxu no kinini tiye tuna lakhi khi kisheluno sasu pa shuka lo iloke. **Piyekusu 18:2 lo** Jisu no akiniu ide ighinike zulo aghau (birds) hami pesu mithemokeu ipi. Jisu no thivekeu lono hi mithela yehza kilivetsuke ipikeuye alatsake. Hi mithela yehza hexavekemiye Jisu ide ighikelono kutsavenani ipi Baibel no piveake (**Isaya 66:15-17**). Judahmi philo kuda chuqu ngo Judahmi kumokemi philo kuda chuqu dolo kutuqukeu anikeshea? Hi mithela yehza ye ado kumtsu lo timi jeli kumtsu ghenguno mlapuatsu anike.



8

## Baibel ye akuputsuji jeli kumtsu lakhapuani keshea?

“Aji (wine) ye pishikiqhi lakhike, akumka ji kushomi ye aqhekuzamike, eno hipauno khunoqo sasu wuvekeno tipaqoye alokutsumi kumoke

(**Aholetsa 20:1**). “Kughou aji (wine) no huchui ipeghivenikeno tipau shou jupuku kevalo, kughou tipauno ajikhu lo mlaghubei ipeghivenikeno, eno muqhole thuvnikeno tipau no apighi no mighike toi sunani, eno tughukupu pighino mikikeu toi sunani (**Aholetsa 23:31, 32**). “Kusalhami ... eno shokumuzumiqo ye Alhou kukaqha mheghi ighilumonani” (**1 Korinthiami 6:9, 10**).

**Khokichile:** Iye. Baibel no hipau ghili lo ighono akumtoshi akuputsuji peithakeu atiche tsu ani.




## 9

## Baibel ye ashiahji shipusavekepu thime axipi toikeyu ghi lakha puanikeshea?



**Khokichile:** Iye. Ashiahji shipusavekepu thime peithamonikeu ghili tsugho Baibel no kiche piyesu puatsu ani: Axipi tsukeu ghi Alhou pulou kumoe.

- A. **Mithemokeu thimeqo peithakeu lono ni shiahji ghuzave eno shikuchubeve cheni.** O phimpi ye Alhou chinehki Akimithe Ghungu no ilo ngo cheni ipikeu noye mthakeshea? Tsutsala khiuana Alhou chinehki shikuchubeve aye Alhou no pa kutsave nani, kughengu Alhou chinehki ye akimithe ke, eno Achineki tipau ye nongu ke" (**1 Korinthiami 3:16, 17**).
- B. **Axipiba (nicotine) ye timi shiahji ghupilevekulupu thime lakhi eno timi pesu tipau qeu lakhi shivetsu cheni.** Rommi 6:16 lo pi akeuno, ninguno khiu momu kiu ikhiluveakeno ningu kutoshi tipau qeu shiive cheni. Axipi tsu eno tipau pesu ajeli thokha mlapuakeu chukeu lono ningu kutoshi tipau launo putosuve mlano tipau qeu shi auve cheni. Jisu no pi, "No ye Ampeu o Lhou mlla lo, eno Pa likhi huthulo" (**Mathi 4:10**)
- C. **Axipi tsukeu lhoayeh ye mithemokeuke.** "Nongu ye panongu launo ipeghivelo, eno nongu kutashi luvelo, ipi Ampeu no pi ani. Kiuno mithemokeno tipau bukevilo, tishiaye lno nongu ikhilunani" (**2 Korinthiami 6:17**). Jisu ye axipi pesu thime jeli kutomo mlakeu kiumu peitha chemoke ipikeu noye mthakeshea?
- D. **Mithemlokeu thime peithakeu lono ni shiahji ghuzavekeu likhi kumono ni kuakini ghi kutomo puwove cheni.** "Noye achuqupu kumokeu lono kiu shiye ow pisa puwove achenikya? (**Isaya 55:2**) Ningu ye Alhou wu pisa jukukutsuuke, tighenguno pisa jukukutsuu ye pulubekulumi lakhi shi aghimayesake" (**1 Korinthiami 4:2**).
- E. **Ni shiahji ghuzavekulupu thime hipaqo peithakeu lono Akimithe Ghungu no ni lolo kichetsu eno pisutsu akeu michimlave cheni.** "Ashi lo lakimine launo putosuvele, tiye aghungu ghumike" (**1 Pitor 2:11**). Ashi lo chunishi shonishikeu peitha chekeuye ashilo lakimine lakhike.
- F. **Ashiahji ghuzavekulupu thime hitoikeu peithakeu lono ni lho ikhove cheni.** Axipi tsu eno tipau pesu mlakeu chukeu lono timi kuxu kughukhovetsu chenike ipi phuiko no shikumtotsu ani. Eno tiye **lpekulu 20:13 lo** noye ghiqhi kevalo ipi puakeu yehza hu hexave ani Tighenguno axipi pesu mlakeu thimeqo launo putosuve aye okuxu ghi kiquhelunanike, ti ithilo.



# 10

## Baibel lo ashiahji kivipu ghenguno akukhuayeh mlapuakeu ye kitilakemu akhoto akeu ye kiukea?

**Khokichile:** Baibel lo ashiahji kivi ghenguno peithakepu kukhuayeh 11 ani.

- A. Aghulhu do achipilo peithalo, ochuqu lo khilemu atha eno ahji chukevilo.** “ado achipi lono chu sholo” (Yetsapiu 10:17). “Alhokuthu lo hipau lhoayeh peithalo, ... nongu chuqu lo khilemu atha (fat) eno ahji (blood) chukevilo” (Achine 3:17).

**Hi ithilo:** Phuiko no shikumtotsu akeuno cholesterol peithakeu lono amulukusu kughaluve cheni. Atha kutomo chukeu lono cholesterol alau ikuve cheni. Alhou yeh Pano kiu piani keno ithi anike kumo keshea?



- B. Chilo chukevilo.** “Chilo chuchekemiye oku-o lo azutachi bepe ngovekeu thoke” (Aholetsu 23:2). Khristo no kutughutsu akeuno, “ashekha tsalaqo lo timiqo ye alikhi aghasumlave nani” (Luk 21:34). Chilo chusu shosuvekeu lono ilo akive lo kheniyimlave keu lono apho lo damlaveno akusupu kutomo kughaluve cheni.
- C. Anheshu kevilo.** Axine kukumusu chilo kumsuvekeu lono apho lo thuulu chekeu laghi lo akupuna tsuve cheni, Baibel no piakeuno, “anhekushu ye apho lo aghiqo (bones) shiputsuetsu cheni” (Aholetsu 14:30). Khristo no ahza ningu tsu akeuno, “Kutamino ni ghochileno sake anhekushu aghakupu launo putosu chelo” (Mathi 5:23, 24).

- D. Alokivishi kunuvuqalei chelo.** “Alokivi mulo lono akivi shinikeu ipeghi cheni, eno kusughu lakhi toi shipivilu cheni” (Aholetsu 17:22). “Pano kiu kumsu ani keno tino pa ghili kuchouke.” (Aholetsu 23:7). Timi no akusupithe kutomo xapu suchekeuye kutami qodaneda chekeu visavilike. Alokivi eno amlokiqi shikeu lono ashiahji kivi shilu cheni, eno axushu cheni.

- E. Ampeu shou qhoi pukhubevelo.** “Ampeu sumsakeu no akuxupu lo sasu ighilucheni, eno hitoi shichekemiye amulokiqishi xu acheni” (Aholetsu 19:23). Ampeu shou pukhubekeu lono ashiahji lo akumto ithulucheni, eno alokivi kuxu xulucheni. “I nu, lno kiu pikeno tipaulo amulo tsulo ... kughengu tipau ikhilukemiye xuanani, eno pano shiahji akumtoshi achenanike” (Aholetsu 4:20, 22). Ashiahji kivi ye Alhou zahkutsu ghou lono ithulucheni.



**F. Akumla pethalo. Ashiahji qokiphe lulo.** "Atsala tsugho ye akumla shilo, ikemu akutsunini ye Ampeu o Lhou tsalake. Noye tipau tsala lo kiu kumlamu shikevilo" (**Ipekulu 20:9, 10**). "Akumla kishimi kuxu ye jumughai ngoniyike" (**Yetsapiu 5:12**). Akumla shi aye chei zuhulu cheni. "Ogi lo tsunhi ipeghi akumla shieno opo okive qechulo" (**Bothubo 3:19**). "Munu zu eno ithe ithuvekeu ye oghenguno adou" (**Leshele 127:2**). "Khetsunhe qholo timi lakhino pa kumlaqo shi, pa mulo lono thokha ghili kumsuwosuaekeuno kiu shilunikea? Pa mulo lo kukumsu huno putholo ghi akulho qhimlave cheni. Hi kumtsu adou" (**Yetsapiu 2:22, 23**).



**G. O phimpi mithemighei qhipuachelo.** "Mithemighei shilo" (**Isaya 52:11**).

**H. Thime kumtsu lo alikhiaghasulo.** Asaxu momu ajume qelunike ghenguno aghili lo ilo ilichekemiye thime kumtsu lo alikhi aghasukeu (temperance) acheni" (**1 Korinthiami 9:25**). "Kumtsu pelono owu iquighaikeu ghili ithulupelo" (**Filipiami 4:5 KJV**) Khristomi lakhi ye ashiahji ghuzavekeu thimeqo kumtsu qhiveno khikhino akivikeno tipaço likhi peitha chelo. Ashiahji ghuzavekepu lhoayeh pape chekuye Alhou zahkutsu hexave ani. Tile ahza tsu akeuno, "Noye ghiqhikevilo" ikemu nono ashiahji ghuzavekepu chuqu kusho chu eno shove keu lono noye olikhi oghuzave ani, eno olikhi oheqhivekeu kipimi oshou benani.



**I. Kiu kiu shiaghiepimu aphimpi ghuzavekepu thime ye qhivelo.** (**1 Korinthiami 3:16, 17**). Atsa hipauye oghenguno akumza aghiluvu. Ikemu shikipivi phuiko no shikumtotsu akeuno, sunika eno kofi eno kutau mthsaminhei shochekeu lo ashiahji ghupileve chekeu (drugs) supuani. Kofi eno sunika lo aloshikumkave chekeu (caffeine) supuani, eno tinguno alau ni shiahji shipusave, ghupile kepu thime akeu nhemughaço ye qhivelo. Akushopu hipaço lo ngosali (sugar) eno akichhizu sumokeloye tipau likhiye achuqu kivike pi peithaluchemo. Isaphaikeu lo akungo suveno jumughai ngoniyi shivetsu akeuye a w no kumla makho kije pesu ni phimpipi shou beve ani eno tiye thime kimishi ton 1.000 pesu tuha-gari (wheel barrow) lo suno tuhaju akeu thoke. Ni shiahji ghupilevekepu thime (caffeine) lo akungo suve akumulu suve puzu chuvi anike, shovi anikepi puzu chusuve shosuve keu lono oshi ghupileve ani. Ishi American mi kutomono kofi, cheha eno akumthsa chuqukushoço chu shokeu lono pano shi ahji ghupileveno itehiye tipau qhimlavekeu shive ani. Hi kumtsu tughami no timiqo shiahji shipusavetsu anike. Timiqo pelo Alhou yehkipe kukaqha vepu zezevepenike ghenguno.



**J. Aghulhu do ye alokivi do lakhi shilo.** "Timi kumtsu no alokivishi chu sho eno pa kumla kumtsu lo akivishi mlalo, tiye Alhou no agho tsukeu lakhike" (**Yetsapiu 3:13**). Nono chu sho akelo amulo shimoghi alokivi kuhano chusu shosukeuye apho lo daluchemoke, titoikeu shikevilo.

**K. Avehu shi aghikemi kuphutsulo.** "Ayikusa kumlano thsupe aghikemi kuqho ve tsulo ... amakho mishishei pucheghikeu peqhiluve tsulo, pukuphulo ... O ghulhu pesu muzutughu kichemi sasu kusaje lo, eno ... haphevekemi kumulhomi okilo sasulo. Aphikumsa cheghikemi pepipelo ... eno ... olau shikipivi itheno qopuutsunani" (**Isaya 58:6-8**). Hile mlalei vethapimivekulupu ghi ani. Ninguno kumulhomi eno athokhami kuphukelono ngu shiahji vikitheluve cheni.





11

## Alhou yehza kughuchove eno thaighave chekemi vilo akhoto kukutsu kiu tsupuanikea?

**“Pishiqhikevilo, Alhou ye pishiqhive mlake; kughengu timino kiu xusukeno tipau ghile hunani” (Galatiامي 6:7).**

**Khokichile:** Alhou no ashiahji yehza tsukeu thaighave chekemiye pano saghi hephovenani, eno akuxu lo pitipuzaqhikeu ghile hunani. Timi lakhino pa w yeghikilu peitha pimive aye akupuna sholuve chekeu toi, khuno Alhou no ashiahji yehza tsukeu hexave anikeno paye ashekha loye qhoi puhavenani” (1 Korinthiami 3:16, 17). Alhou w ashiahji yehza ye ishi a puzu thoghiiye kuhavenikekumo.

Tipaqo ye alhoayeh lono achekeuke. Kunguyeghiqha ghenguno mlape qhipuatsukeu, sunhekilepe achekeu yehza toike. Ayehza hipau hexavekeu lono shikupusa

sughive cheni. Baibel no pi akeuno, “ghushomokeloye angusu ikughi chemoe” (Aholetsa 26:2). Ashiahji yehza hexavekeu lono shilukusa momu akupuna ighicheni. Alhou no ningu kimiye kelauno ashiahji akivishi qhipuanikeu yehza pesu ningu tsupuanike. Ninguno tipau hexavekeu lono ningu shou shikupusa ikughive cheni.



12

## Ningu tianuligo shiahji lo shikupusa ikughuve chekeu kuchou ye kiukea?

**“Nongu ye hipau chukevilo, tishiaye nongu thiu nongu nuli eno no tilimiqo ye vi achenanike” (Zahkiniu 12:25).**

**“Ni Ampeu nongu Lhou ye anhekushu Lhou lakhi ke, apuh noqo xine lono iqi anuli tiqheli kuthu eno bidi kutolo l mithi chekemiye lno xujuchenani” (Ipekulu 20:5).**

**Khokichile:** Alhou no hitoi ningu lau mutsuqhei pephe piyesutsu akeuno, annuli eno atilimi tiqheli bidi kutolo apuh azanoqo no aghuzu anikha shi Alhou no ashiahji yehza tsupuakeu thaighavetsukeu ghime panongu pelo pupenani. Apuh aza noqono Alhou no ashiahji yehza tsukeu thaighavetsukeu ngusu hu anuliqo eno atilimiqo no ijusui, miqemilei eno kusukini likhi shikeu mheghi ighipenani. Kughengu pano shiahji kivipu ghenguno tsukeu yehza hu panonguno papemoveke. Onuliqo eno otilimiqo akughupu shi thuu ipechekemiyo kuxu ghuzavetsu monike ghenguno noye ashiahji ghuzavekepu chuqu kushoqo qhivemokeshea?




# 13

## Alhou tsa kuchou kutaugo kiu kiu ghi tsupuanikea?

**"Thime kiu kiu lopimu**

**shikuchhubekemi ye Alhou kukaqha jukuvu lo ilomlanani" (Piyekusu 21:27). "Khiuno pa mulo lono kuchhubekupu eno aphukumqhupu thimeqo jumine eno pape wuvenikeno , lno panongu kumla jume pesu panongu kutsu shou betsunani ipi Ampeu Alhou no pi ani" (Ezekel 11:21).**

**Khokichile:** Kiukiumu shikuchhubeve eno mithemovekeu ye Alhou yehkipekukaqha lo iloghipeponani. Mithemuzumokeu ghushoshili huno timi lakhi shikuchhubeve cheni. Mithemokeu chuqu kusho chu shokeu huno timi lakhi shikuchhubeve cheni **(Daniel 1:8)**. Hiye kitila toi, ikemu kuchou eno kijeke. Timiqo no pano likhi pano laghino achipiuke ipi kisheluve puzu Alhou pulou kumo shivekeu lono pano ghenguno lhokta kuxupu laghi kutope puatsukeu hu vezuve cheni, puhave cheni eno xamlave cheni **(Isaya 66:3, 4, 15-17)**.



# 14

## Aghokulumi Khristomi qoye amulokutsushi kiu mlamayesakea?

**"Ningu kumtsu ashi eno aghungu kimithekumo launo mitheluvени nolo"**

**(2 Korinthiami 7:1). "Khiuno Khristo lono hitoikeu lajupu pano lolo xapu cheghinikeno**

**tipanoye panokutoshi shikutsughuluve cheni, kughengu Khristo no tsughukhuike ghenguno"**

**(1 Johan 3:3). "Tsutsala nono l kimiye aghiaye noye l zahkutsuqo papelo" (Johan 14:15).**

**Khokichile:** Aghokulumi Khristomiqo ye pano kuxu pesu Alhou no ashiahji kivishi qhipua chepenikeu yehza tsupuakeu papecheni, kughengu panongu ye Pa kimiye chenike ghenguno. Pa yehza hipauno pano kuxu lo alokivi sughitsu cheni eno tughami no tsukeu kusupithe lhokusaqo launo panongu sushuluve cheni **(Apostolmi 10:38)**. Alhou no kutsupiyekue yehzaqo ye alhokuthu lo ningu kivipu ghengunoke. Apuh azanoqo kukutsuno kiutoi anuliqo kivipu shitsu chenikeno titoiqe. "Khiuno akivi mlanikeu ithi anikemu mlachemokeno tiye pa ye axine shiveake" **(Jems 4:17)**.



15

## Alhokusa lhoayeh no hami thsupe acheni, panonguye kiu shimayesakea?

**"Pa ikhiluvekemiyo pelo Alhou nuliyo shiluvepenike Pano achipiu tsucheni" (Johan 1:12). "Niye Khristo no l shikumtotsu chekeu vechewono thime thokha kumtsu shilunani" (Filipiami 4:13).**

**Khokichile:** Noye alhoayeh hipaço kumtsu pesu Khristo pukhu philo qhivetsulo, tishiye Pano alokivishi amulokithe pesu otsu puzu opelo ghushoghili lhokusa eno alhoayeh lhokusaço launo xaide ighieno Alhou nuli lakhi shiluvepe nanike" (Ezekel 11:18, 19). "Alhou gholo checheaye thime thokha lo tokolupu anike" (Mark 10:27) ipikeu tsa ye kiutoi amulo lo alokughunopu tsa lakhi kela! Jisu no pi, "Khiuno l lau ighinikeno Niye kiu ghola lonomu pa qhivemonani" (Johan 6:37). Jisu no axine kichhekighi huno ningu thsupe akeu kuqhovetsunike kutope ani. Paye ningu pesu axine launo ililai shivetsunike pulo ani. Pa pelo tipau ningu lau shitsu penike ghenguno ningu kutoshino Pa lau ighimayesake. Ningu mulo lo Pa sasuluve paghimayesa. Ningu ghilisuqe lhokusa ghenguno ni mulo ghime shichekeu, eno ni mulo kusashi msachekeu kumtsu Pano ikhisuuvetsu nani, tsutsala nunguno Pano pikeu gholuaye. "Hipaço kumtsu ghili lno nongu vilo pi ighiveake ... tsutsala nonguno papeluaye nongu lokivi ye iku chhitoiluve nani" (Johan 15:11). Satan no alokughuno ye agholumokeu lono ithuluchenike ipi acheni, ikemi tiye akimiki ke (Johan 8:44).



16

## Alhou kukaqha akitheu lo kiutoi keu akichiqhikepu piqhi puanikea?

**"Tilehi kughuna kuami khiunomu niye suani ipimonani" (Isaya 33:24). "Tilehi akithi kuhanani, amulokusa amuloghime kuhanani, kuqakumulokuhani eno tilehi kushukuqha kuhanani" (Piyekusu 21:4) "Panongu ye alhuqu chishibo pepuluve nani, panonguno pokelo khilemu akulho shivemonani, panongu no ithu alachekele khilemu qevemo nani" (Isaya 40:31).**

**Khokichile:** Alhou kukaqha akitheu lo kughunani kemiyo ye Alhou no kichetsukeu shiahji yehza papeno xuchekemi shinani, tishiye lono tilehi kusukini, kulhokini shimonani eno akusupithe ghi kuhanani. Tilehi kuxumiye alhokuthu lo alhothe ano akumtoshi xuchepenike kumughave tsunani. Tishieno lhokta Alhou gholo alokivi kije lono xuchenani.

17

## Ashiahji akivishi qhipuachenikeu yehza ye Baibel lo akeu kukhuayeh lakhi ke ghenguno noye tipau yehza pape ghi xu anishi anima?

**Nono khochilenikeu:**

# Nono Iniju Keu Khochiletsu Ani

## 1. **1 Timothi 4:4 lo piakeuno, Alhou w lhoux kumtsu akivi, tighenguno kiumu tuchilevekepu kuha, momu kikhekile shikepu kumoe ipi akeu ghili hepho piyesulo?**

**Khokichile:** Kuchoyehsu hipau lo pipuakeuye achuqupu khikhi Alhou no lhosu puakeu Pa w timiqo ye shikimithikeu lono ikhilunikeu pi ani. (ajo 3). Achuqu hipaquo ye **Achine 11 lo eno Zahkiniu 14 lo tsupuakego ke**. Hipau ghili **ajo 4** lono mutumishei kimichitsu akeuno, Alhou no lhosupuakeu lhouxquo gholo khikhino akimithe lhoux keno tipaquo ye shikimithi keu lono ikhilunikeu pi ani. **Ajo 5** lono pi akeuno, kushiye lhoux (achuqupu) tipaquo ikhilulokeu keno kichepiyesu ani. Tipaquo ye Alhou tsa no "shikimithe" vetsu ake, tighenguno tipaquo ye akimitheke, eno kumughatsukeu kighini betsukeu gholono chu eno shopenike kutopuatsu ani. Ikemu hi ithilo, timiqo no mithemokeu chuqu pesu panokutoshi akimitheke ipi puzu chuchekemiqo ye puhavenani" (Isaya 66:17).

## 2. **Mathi 15:11 lo akichi lono kiu ilokeno momu kiu chusukeno tiye timi shipusa chemoe, ikemu akichi lono kiu ipeghikeno tipauno timi shipixive cheni ipikeu hepho piyesutsulu nanima?**

**Khokichile: Mathi 15:1-20 lo** tsupuakego lo chunikelo atughushi aw mtsunikeu pi ani (ajo 2). Hipau lo aw mtsukeu kumo puzu azukuchhunenikeu pi ani. Achine yehza kiqu lono ayezha kukutsumiqo no pipuakeu lo, kuchukusho shimphi zuuno azukuchuvemo kemi ye achinneh lo kitiqevekemi lakhi shivekeu pi ani. Jisu no pikeuno Achine lo kukhuayeh kiqu lono azukuchhu keuye kiumu akiqi kuhae ipi. **Ajo 19 lo** pi akeuno, alhokusa hami, ghighi, shupusalha, akupuka akimiki eno kutau kutauquo shikevilo. Hipaono timi shipixi eno shipusave chenike, ikemu aw mutsumono chukeu ye timi shipixi chemoke ipi (ajo 20).

## 3. **Ikemu Apostolmi 10 lo Pitor samo lo tughashiqo ye Jisu no shikimithevetsu ake kumokeshea?**

**Khokichile:** Kumoe. Piyekusu hipau lo tsupuakeu ye tughashi kiqu kumo, ikemu timi shiyeh jeliqo kiqu piyesutsukeu ke. Alhou no Pitor lau piyesukeuno Judahmiqo no puluchekeu toi Judahkumomi (Gentiles) qo ye mthakemiqoke ipi kichepiyetsu. Alhou no Judahmi kumokemi Korinnelius vilo timi hape Pitor kuu pelo ipi. Tsutsala Alhou no asamo lono pa lau piyesutsumoke aye Pitor ye Korinnelius no timi pa lau puukemi milivetsuni che, kughengu Judahmi ye judahkumomi sasu kahalimonikeu yehza anike ghenguno (ajo 28) Ikemu timiqo no pa phu ighikelo panongu sasu, eno pi, paye hipau shimokepu shia, ikemu "Alhou no lvilo timi khiumu pesu mithemokeu ipi kevilu ipivea" (ajo 28). Hipau shelo **Apostolmi 11 lo**, akukuhomiqo no Pitor pipusa, kughengu pano judahkumomiqo sasu kuputsake ghenguno. Tileno Pitor no Alhou no pa samo lono kiu piyesutsukeno qhoi xalepe panongu vilo pive. **Apostolmi 11:18 lo** pi akeuno, "Kughou panongu hipau ghili chilukeno tile panongu ye inaqhoi ngove, eno panonguno Alhou jukuvu shitsu eno pi, "Tishi aye Alhou ye judahkumomiqo pelo ghi amlopebidesu akupulu lo iloghilunikeu shi pulovetsu akena" ipi.

## 4. **Tsutsala awoshi chupemokepushi aye kushiye Pa ye awo lhosukea?**

**Khokichile:** Alhou no awo lhosukeu toi aghau buzzard ghi lhosuke, tipaquo pelo axine khuleve chekemi toi ayeghi lo xinexighe kuchubekepuquo shikimitheve penike ghenguno.



**5. Rommi 4:3, 14, 20 lo pi akeuno, “Khiumo chuchenikeno pa pelo chuchemokemi thaighape kevalo ... kughengu tile kiumo mithemokeu kuhake, ... thime kumtsu kuchouno akutsughu ke” ipikeu ghili hephopiesulu nanima?**

**Khokichile:** Ajo 3- lono 6 kutolo tile chuchekemi eno chuchemokemi dolo kutuqukeu ghili tsupuanu. Panongu dolo khiu khiumu achipike ipiamoe, ikemu tile pi akeuno, khiumu khiu shou kughathabe kevalo, Alhou pelo xatha pelo (ajo 4, 10-12). Ajo 14 eno 20 lo piakeuno achuqupu tipau pesu atighishi ajulho mllave paghi cheni, eno tiye Achine kukhuayeh kiqi loye mithemokeu shivea. Achine yeh kiqi loye shikuchhubevekeu chuqupu lakhi shivea” (1 Korinthiami 8:1, 4, 10, 13 lo ghi phijulo) Ninguno hile kuputsa akeu kimijiye achuqupu pesu ajulho mlla vekeu ye mithemovea ipikeu ghili kuputsa ani. Ikemu kuchouno pinikeu lakhi loye ajulho (idol) ipi akeuye ayeghi lo thime kiumu kumokeu lakhike (1 Korinthiami 8:4). Ikemu timi lakhi kukumusulo lono hitoikeu chuqu ye chukepukumoke ipi lipikeu aghiaye pa pelo chupekevalo, momu pano tipau chukeye lono kutami lakhi pukhu pusuvetsukepu shi aghiaye paye tipau chukevalo.


**6. Alhou no ashiahji yehza tsukeu papemo pimu nikutoshi Ampeu kikimiye lo xu aghi aye tino lukumkhake kumokeshea?**

**Khokichile:** Tsutsala nono omulo kuchouno Alhou kimiye ani ipi aghiaye, noye Pano ashiahji yehza tsukeu papemayesa nani, tishikeu lono Pano opelo aghungu lo shiahji kivi lo, alokivi lo, eno akutsughu lo xuchepenikeu shi pughu puatsu anike ghenguno. “Kughengu Pano Pa gholukemiqu wu lhokta Xachilekuluu Ampeu shiluveake” (Ibrimi 5:9). Jisu no pi, Tsutsala nono l kimiye aghiaye l zahkutsuqo papelo” (Johan 14:15). Kughou ninguno amulo kuchou no Ampeu kimiyenikeno ningu ye pakutoshino Ampeu no ashiahji yehza eno ahzakutsu kutau tsupuakeqo kumtsu papenishive nani. Tishimlave aye okutoshi Ampeu zahkutsuqo papenikeu lo jekukivi kutomo jekuuvanani, eno papemove nani. “I vilo Ampeu, Ampeu ipi kuchekeu kumtsu kungugha kukaqha lo ilolumonani, ikemu l Puh kungugha lo kua pulou shichekemi likhino ilolunani” (Mathi 7:21).

**Hilehi okumtsu eno injuakeu pitsulou**



01



02



03



04



05



06



07



08



09



10



11



12



13



14

## Akiphi hipau ghi akiphi kichekutsu 14 gholo kakhi ke.

Akiphi kumtsu lo akumzapu kuchouqo, khipaano o kuxu eno no kibolomiqo kuxu pekilivetsu kulupu ani eno tipauno nongu sasu lhokta jajupu lo ighikulupu ani. Akiphigo gholo lakhimu vezuvekeu shikevilo.

**Akiphi kichekutsu 01:** Tile nono pulube Lukepu kiuana qhiveakeshea?

**Akiphi kichekutsu 02:** Alhou ye Tughami Ihosukeshea?

**Akiphi kichekutsu 03:** Akithi laono xapheluve

**Akiphi kichekutsu 04:** Tsutsu yeghiqha dolo Aphughi kije

**Akiphi kichekutsu 05:** Alokivi kulakupu tsapi

**Akiphi kichekutsu 06:** Atulaphaqo shou yehpukutsu

**Akiphi kichekutsu 07:** Xu-lhe lo atsala lakhi puhavekeu

**Akiphi kichekutsu 08:** Qhoi xapheluve -Jisu Khristo ideighini keu

**Akiphi kichekutsu 09:** Akutsughu eno Akuka

**Akiphi kichekutsu 10:** Kithimi ye kuchouno thiveakeshea?

**Akiphi kichekutsu 11:** Amiyizu ye Tughami pichepuani keshea?

**Akiphi kichekutsu 12:** Alokughuno mpe 1,000

**Akiphi kichekutsu 13:** Alhou no ashiahji kivi kupughu shitsu

**Akiphi kichekutsu 14:** Aghokulu ye ayezza lakhi shiveakeshea?

Kughou no no atughiu Akiphi Kichekutsu-u 14 pihigive nikeno itaghi niu mlakiphe akiyeh lono khulo:

Amazing Facts India, Post Box No 51, Banjara Hills, Hyderabad-500034

Kimiyepe Summary Sheet hipau kishekha mpho zuwuno akiphi phijulou. Khokichile kumtsu akiphi kichekutsu lono ithulunani. Chejuno achipiu khokichile lo sutsulo. **Akikihi parentheses lo piyepuakeu (1) no khokichile achipiu ke.**

**Form tipau pichivenikeu ghenguno kimiye pu “Adobe Reader” peithalo.**

**1) Alho no timi shiahji ghili kichetsu akeuye (1)**

Itimiyo ghenguno avehupu ikemu kichimiyo ghenguye akhoto kutuye kumoke  
Hipau ye Baibel chineh lo saje akhoto lakhike  
Hipauye luthu lakhi chineh lo avehu kuha

**2) Alhou no ashiahji yehza tsukeu ye (1)**

Ningu kivipu ghenguno tsupuanike  
Hipau ye Judahmiyo ghenguno tsukeuke  
Pano ningu shou atou kehu ningu  
ghasulovenike ghenguno tsukeuke

**3) Kuchou Khristomiyo ye (1)**

Pano kiu pulokeno chu sholunani  
Alhou no tsukeu ashiahji yehza papemo pimu  
akiqheu lono Ampeu kimiye cheghiaye tino  
lumkhake, kughengu hipau ye cross lono  
ikhivetsuake.  
Achuqupu khipauno aphimpi, akukumusu,  
eno ghilisuqe shikumtolo puzu Alhou gihulu  
nanikeno tipaquo chu sholo.

**4) Timi chuqu atighiu ye (1)**

Axathi jeli, aghinathi (grain) eno aghino  
kuzupeakeu ghakuthi toikeu  
Akuputsuji shokeu, eno ashi chukeughi  
sukuqha ani  
Adam eno Eve pama no chuchekeu xathi  
kumtsu kuqha ani

**5) Alhou kichepuatsukeu lhoux hipaquo ye mithemokeu ke (7)**

Amishi	Rabit	Clam
Awo	Catfish	Atsuko
Awu	Ashe	Atsuko
Ajigili	Azu kimithe kha	Ane

**6) Akuputsuji ye (1)**

Aghibiu lono sho aye Khristomi kumtsuno  
sholunani

Timi lakhi ye hipau shokepu kumo, tsutsala hipau  
shokeuye achipi kumoke ipi pano ithi aghiaye  
Khristomi lakhi ye hipau peithakepu kumoe

**7) Axipi eno tipau pesu mlakeu thimeqo peithakeu ye (1)**

Luthu kumla kethono pa chineh sasu kumu  
kuthsukimeku kuha  
Axine, Khristomi lakhi ye kiu kiu ghola lono  
mlapuaghie pinamu khilemu peithakepu kumo  
Hipau no Khristomiyo ghenguno allashilucheni

**8) Hi aqhou ashiahji yehza tsupuakego phujulo (9)**

Chilo chukevilo  
Aghulhu thiu axipi tsuvelo  
Tishieno alokivishi eno aloinoqhiyi shilulo  
Aghulhu zuuno aji kitila muqavelo  
Ophimpi mithemighe qhipuachelo  
Awoshi kutomo chulo  
Sunizu eno kofi kupukunoshi yelo  
Thime kumtsu lo alikhi aghasulo  
Aghulhu do achipi lo qhilo  
Muchhomunu kevalo  
Achipi lono mla eno ashiahji qokiphe luno zulo  
Ampeu shou pulubelo  
Lhouxquo tha eno ahji chulevilo

**9) Alhou no ashiahji yehza tsukeuye ighono akhoto eno tipau ye (1)**

Apuh azanoquo no Alhou no ashiahji yehza  
tsukeu papemone kughuchovekeu lono  
anuliqo eno atilimiyo phimpi miqemileive  
eno akukumusu lo tomochhimove chenipe  
Ayehza hipau ye judahmi ghenguno kethono  
ningu ghenguye avehu shimovae  
Tsutsala ninguno kuchouno Khristo kimiye  
luve aye ashiahji yehza ye akhoto kumoe

**10) Axine shivekulupu lhoayeh theqhiluvenikeu laghi akiniu ye (1)**

Aghugha kulu pinhevekepu  
Qhoi pesu Khristo lau tsuvekepu, tishi aye  
Pano hipaqo shou tokulupu kuka tsunani  
Tipaqo ye povenani ipi lajupu qhilo

**11) Alhou w ashiahji yehza ye (1)**

Yeghikulu peithanikeu yehza toike, tipau ye  
ningu ghennguno akiviu, tipau kughuchove  
aye shikupusa lo ilove cheni  
Muse yehzaqo gholo hamiye cross lono  
shipuhavea  
Akukumusu kivi lakhi, ikemu tipaqoye luthu  
lakhino Alhou sasu kuposhunikeu lakukha ye  
kiumu kuha

**12) Amikuchomi Khristomi ye (1)**

Akighini ado alau puwoghi shicheni eno  
Alhou no ashiahji yehza tsukeu kughuchove  
chemi  
Alhou yehza sasu kupunakeu sholuve aye  
paikhavino alhoayeh kilive cheni, kughengu  
ningu ye Khristo kimiye cheni eno alokivishi  
Pa yehzaqo pape achenike ghenguno  
Axipi ye ililai tsulunani

**13) Alhou no ashiahji yehza tsukeu papenikeuno I kupughuke**

Iye Moe

**Kungu inju puakeqo achipilo khochile tsulo!**



**Tilehi kihisuvani keghenguno oje, email eno thepiu kikihi sulou.**

Owu akiphi kichekutsu KUMUSA no ithuluni keghenguno "Sulou" lo inalo.

<b>Oje :</b>	<input type="text"/>		
<b>Owu Email :</b>	<input type="text"/>		
<b>Thepiu kikihi :</b>	<input type="text"/>		
<b>Okungo-a :</b>	<input type="text"/>		
<b>Aphugui, District :</b>	<b>State :</b>	<b>Aghaqhu :</b>	<input type="text"/>
<b>Pin :</b>	<b>Apunu mpe amqo:</b>	<b>Gender :</b>	<input type="text"/>

Anile shi no kusutsa nikeu tipau tsulou